



## Hooseglunggi 2007

In Ziiri isches Tradition  
Do sait dr Bappe zu sym Sohn  
Me goot ans Knabeschüüse und zem Bööggverbränne  
Kasch au ins Hallestadion  
Tennis Masters Addraggtion  
Oder MvZ heisst es Veloränne  
By ihrem nägschte Säggisichälle  
Mache mir e scheeni Wälle  
Dr Meischtertittel wenn die hoole  
Sogar dr Böögg dä wird ne gstoole

Dr Minu isch jetz offiziell  
Ehegatte vome Gsell  
Syt am 1. Januar isch das erlaubt  
Partnerschaft wie Maa und Frau  
Är isch d Frau das weiss men au  
Ändlig kenne die das au me hätts nimm glaubt  
Dr Alldaag hooltse denn gly yy  
Wär darf am moorge dr erschti sy  
Dusche cremele epiliere  
Es mien jo baidi sich rasiere

Syni absolute Draim  
Är bindet sich an alli Baim  
Wenn das nyt nutze soll goot är in Hungerstraigg  
Syt neischtens hett är kai Problem  
Är segglet ohni Strom bequem  
Frait sich iibere Bryys won är schyyns gwunne haig  
D Wasserschtreemig duet in dryybe  
Iibere Wind darfsch au nid schryybe  
Vossi wach uff uss dyne Draim  
Uff zmooll goots jetz au ohni Baim ?!?!?

Si hetts schwär mit mir ellai  
Ych saag doch nie ebbis dehai  
In dr Buude leen si si au nid in Rue  
Y zahl in de Lääde s Fuetter  
Gib au Gäld dr Schwiegermuetter  
Am liebschte schliesst si alli ihri Tiire zue  
Als Kolleg duen ych jetz frooge  
Hetts si di ebbe betrooge  
Was isch dy Frau sag syg so lieb  
Regierigsroot im Baselbiet

Ych als Schlemmerfrind begriesses  
Gits noohem Ässe ebbis siesses  
In jedem Schwyzerkaff - gits ebbis Speziells  
Die faine Riccola vo Laufe  
Zuger Kirschtorte muesch kaufe  
Luxeburgerli sau tiir aber was sells  
Ziircher Hyppe sin die runde  
Au die lieben alli Kunde  
Wenn jetz e Läggerli duesch boschte  
Verdient nur aini ussem Oschte

Die siebe Bundesreet in Bärn  
Hänn sich immer nooni gärn  
S Kollegialbrinzip das halte die nit yy  
Y seh das ganz uss anderer Sicht  
Es isch doch wie by alte Friicht  
Si wärde runzlig und es git e schlächte Wy  
Alti Zwätschge jungi Beeri  
Passe wuurd no d Gigi Oeri  
Dr Blocher sait zu alle cool  
Die schwarze (Friicht) sin doch alli fuul

Liebe Chrigel bisch nimm grooss  
S gheit dr s Glygg nimm so in Schooss  
Dyni Zyt by uns am Rhy isch jetz verby  
Leer dy Käschtl syg e Maa  
Ruum dy Blatz fir ain wos kaa  
Wo isch d Mannschaft wo de saisch das kaas nit sy  
No dis noh hesch do verdryybe  
Mäng ain wo no gärn wär blyybe  
Nimm dr Huet du heschs doch gseh  
Mir wänns am Hitzfäld iibergeh

Drämmlilehrer mien in Kurs  
Änglisch leehre sait dr Urs  
An dr EM sott me s Puplikum verstoo  
Wemmer Päch hänn das wär s miese  
Kemme Spanier, Portugiese  
Kain verstoot is und mir steen unwissend doo  
Do in Basel isch das e soo  
Die fremde Sprooche kame doo  
Mir sin is gwoont und das diräggt  
Wägem Ziircherdialägg

D Sportler gänn en Interview  
Die ainte hänn halt mehr IQ  
Wenn's am Fähnrseh hersch - deents halt denn e soo  
Ych ha Hyte halt nit gwunne  
D Fäns hänn wirgglig gar nit gsunge  
Y ha alles geh es isch halt z wenig koo  
Sie sait ych by jetz no ganz Baff  
Ass ich das allewyyl no schaff  
Schwätze dueni wiene Binggis  
My Namme isch Martina Hinggis

Jetz brunnst die Blocherdinaschty  
Scho diräggt in unsere Rhy  
Dr Dalbedyych fliest schliesslig duur si Fabrigg  
D Läggerli wärde fabriziert  
Und mit Bienehoonig gschmiert  
Jetz laitet s Miriam die Bude mit vyyl Gschigg  
Ans Bööggerverbränne darf si nit  
Als Ziircherfrau machsch aine mit  
Am Schluss e Glapf dr Böög wird rot  
Jetz isch dr gscheitschti Ziircher doot



---

### Wottsch au by uns bänggle ?

Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---